

PWYLLGOR TRWYDDEDU CANOLOG, 04.03.13

Yn bresennol: Y Cynghorydd W.Tudor Owen (Cadeirydd)

Y Cyngorwyr: Eddie Dogan, Annwen Hughes, John Brynmor Hughes, Llywarch Bowen Jones, Eryl Jones-Williams, Christopher O'Neal, Peter Read, Angela Russell, Ann Williams, Elfed W. Williams

Hefyd yn Bresennol: Siôn Huws (Rheolwr Cydymffurfiaeth a Iaith), Gwenan M. Williams (Rheolwr Trwyddedu) a Gwyn Parry Williams (Swyddog Cefnogi Aelodau a Chraffu)

Ymddiheuriadau: Y Cyngorwyr Huw Edwards, Chris Hughes, Gethin G. Williams, Gruffydd Williams

Cyhoeddiadau'r Cadeirydd

- Dymunodd adferiad buan i Amlyn ab Iorwerth, y cyn Rheolwr Trwyddedu, yn dilyn ei anhwylder diweddar.
- Dymunodd yn dda i Alwyn Thomas, Swyddog Gorfodaeth Trwyddedu a fydd yn ymddeol diwedd y mis hwn.

1. DATGAN BUDDIANT PERSONOL

Ni dderbyniwyd datganiad o fuddiant personol gan unrhyw aelod oedd yn bresennol.

2. MATERION BRYD

Cyfeiriodd aelod at fater ym Mhwllheli mewn perthynas ag ymgyrch prawf prynu alcohol. Nodwyd bod person ifanc yn mynd o amgylch tafarndai'r dref ym mhresenoldeb Swyddog Cefnogi Cymunedol yn yr Heddlu er pwrpas profi bod deilwyr trwyddedau mewn eiddo trwyddedig yn sicrhau bod staff yn cymryd y camau priodol i wirio oedran person ifanc, cyn gweini alcohol iddynt. Nodwyd bod y prawf prynu wedi digwydd gan ddefnyddio person ifanc lleol, a oedd dan ddeunaw oed, Pan wnaeth y person ifanc gais i brynu alcohol mewn tafarn ym Mhwllheli, ni wnaeth deilydd y drwydded gwestiynu'r weithred, er ei fod yn gwybod bod y person o bosibl dan ddeunaw oed, gan bod swyddog o'r heddlu'n bresennol. Ni ofynnwyd am dystiolaeth oedran drwy gyflwyno cerdyn adnabod. 'Roedd deilydd y drwydded yn teimlo bod amgylchiadau'r prawf pryniant yn annheg, gan bod y person ifanc yn lleol, ac ym mhresenoldeb swyddog o'r heddlu.

Mewn ymateb, hysbysodd y Rheolwr Trwyddedu bod yna ystyriaethau yn y broses prawf prynu sydd angen eu hystyried ac un ohonynt yw iechyd a diogelwch y person ifanc. O ran profi oedran, 'roedd cyfrifoldeb ar ddeilydd y drwydded i ofyn am gerdyn adnabod gan berson ifanc beth bynnag yw'r amgylchiadau.

PENDERFYNWYD tynnu sylw'r heddlu at y mater.

3. COFNODION

Llofnododd y Cadeirydd gofnodion cyfarfod o'r pwyllgor a gynhaliwyd ar 10 Rhagfyr 2012, fel rhai cywir.

4. COFNODION IS-BWYLLGORAU TRWYDDEDU CANOLOG

Cyflwynwyd, er gwybodaeth, cofnodion cyfarfodydd o'r Is-bwyllgor Trwyddedu Canolog a gynhaliwyd ar 29 Tachwedd a 12 Rhagfyr 2012.

Materion yn Codi – Presenoldeb aelodau yn yr Is-bwyllgorau Trwyddedu

Cyfeiriodd y Cadeirydd at drafferthion a gafwyd yn yr is-bwyllgor a gynhaliwyd ar 22 Chwefror 2013 oherwydd na fu i un aelod bresennoli ei hun. Oherwydd hyn, bu rhaid i un o'r aelodau eraill fynd i nôl yr aelod oedd wrth gefn a bu cryn oediad cyn dechrau'r cyfarfod. Awgrymwyd ar gyfer y dyfodol, y gallai fod yn fuddiol i'r aelod wrth gefn fod yn bresennol yn y cyfarfod rhag ofn i sefyllfaoedd fel hyn ddigwydd eto. Ar y llaw arall, mynegwyd y farn bod y drefn bresennol wedi gweithio am flynyddoedd ac mai eithriad prin oedd sefyllfa fel yr un y cyfeiriwyd ati.

Mewn ymateb, hysbysodd y Rheolwr Cydymffurfiaeth a Iaith y byddai manteision i gael yr aelod wrth gefn yn bresennol yn y cyfarfod, yn enwedig pe byddai aelod yn methu cymryd rhan ar fyr-rybudd e.e. oherwydd salwch neu pe byddai'n sylweddoli yn y cyfarfod bod ganddo/i fuddiant sy'n rhagfarnu yn y cais gerbron.

Sylwadau Aelodau Lleol

Cyfeiriodd aelod at achosion lle nad yw aelod lleol wedi cyflwyno sylwadau'n ysgrifenedig ar gais am drwydded, ac wedyn, ar ôl derbyn rhaglen yr is-bwyllgor, yn presennoli ei hun yn y cyfarfod, gyda'r dybiaeth bod hawl ganddo i gyflwyno sylwadau ar lafar.

Mewn ymateb, hysbysodd y Rheolwr Trwyddedu efallai y gellir adolygu'r drefn o ran atgoffa aelodau lleol. Nododd pan dderbynnir cais am drwydded, mae'r Adran Drwyddedu yn gwahodd aelodau lleol i gyflwyno sylwadau perthnasol.

PENDERFYNWYD derbyn y wybodaeth.

5. DEDDF CERDDORIAETH FYW 2012

Cyflwynwyd adroddiad y Pennaeth Adran Rheoleiddio ar Ddeddf Cerddoriaeth Fyw 2012.

Adroddwyd gan y Rheolwr Trwyddedu y daeth y ddeddf uchod i rym ar 1 Hydref 2012 gan ddiwygio'r Ddeddf Trwyddedu 2003 drwy ddireoleiddio'n

rhannol perfformiad o gerddoriaeth fyw a diddymu'r angen i drwyddedu darpariaeth o gyfleusterau ar gyfer adloniant.

Rhoddodd grynodedb o'r prif newidiadau fel a ganlyn –

- Ni fydd angen trwyddedu cerddoriaeth fyw heb chwyddseinydd rhwng 8.00 a 23.00 mewn unrhyw fan.
- Ni fydd angen trwyddedu cerddoriaeth fyw drwy chwyddseinydd rhwng 8.00 a 23.00 mewn eiddo a drwyddedwyd i werthu alcohol ar gyfer cynulleidfa o ddim mwy na 200 o bobl.
- Ni fydd angen trwyddedu cerddoriaeth fyw drwy chwyddseinydd rhwng 8.00 a 23.00 i gynulleidfa o ddim mwy na 200 o bobl mewn gweithleoedd.
- Diddymir yr angen i drwyddedu darpariaeth o gyfleusterau ar gyfer adloniant.
- Ehangir ar yr eithriad i ganiatau cerddoriaeth fyw pan mae'n ran o berfformiad o ddawns draddodiadol, fel bod yr eithriad hefyd yn cynnwys cerddoriaeth drwy chwyddseinydd a cherddoriaeth wedi ei recordio.

Nododd bod cerddoriaeth fyw, gan gynnwys cerddoriaeth drwy chwyddseinydd ac wedi ei recordio, yn parhau i fod yn drwyddedig dan wahanol amgylchiadau, a rhoddodd fanylion amdanynt i'r pwyllgor.

Mewn perthynas â gwarchod trigolion rhag sgîl effeithiau negyddol yn deillio o gerddoriaeth fyw, nododd y gellir gosod amodau parthed cerddoriaeth fyw hyd yn oed rhwng 8.00 a 23.00 mewn eiddo trwyddedig sy'n destun adolygiad oherwydd cwynion sŵn. Yn ogystal, os nad yw trwydded eiddo cyfredol yn awdurdodi cerddoriaeth fyw, mae'n bosibl ychwanegu amodau i'r drwydded a fyddai'n cael yr un effaith petai'r gerddoriaeth fyw ar yr eiddo'n parhau i fod yn adloniant rheoledig, hyd yn oed rhwng 8.00 a 23.00.

Fe allai'r Awdurdod Trwyddedu hefyd wneud penderfyniad bod cerddoriaeth fyw ar eiddo yn weithgaredd trwyddedig ac ni ellir caniatáu cerddoriaeth o'r fath heb ganiatâd ar y drwydded eiddo neu drwy Rybudd Digwyddiad Tros Dro.

Mae Deddf Gwarchod yr Amgylchedd 1990, sy'n ymwneud â rheoli niwsans sŵn, yn parhau i fod yn berthnasol ar gyfer sefyllfaoedd lle mae tystiolaeth bod sŵn yn niwsans statudol. Nid bwriad Deddf Cerddoriaeth Fyw 2012 yw caniatáu eiddo trwyddedig i greu niwsans sŵn.

Yn dilyn ymgynghoriad Adran Diwylliant, Cyfryngau a Chwaraeon y Llywodraeth yn 2011, mae'r Llywodraeth yn bwriadu cyflwyno mesurau pellach i ddiroleiddio adloniant, gan ddechrau yn Ebrill 2013. Bwriedir diroleiddio'r canlynol –

- Perfformiadauawns a dramau i gynulleidfaoedd hyd at 500 o bobl, rhwng 8.00 a 23.00.
- Chwaraeon tu fewn i adeilad ar gyfer cynulleidfaoedd hyd at 1,000 o bobl rhwng 8.00 a 23.00.
- Cerddoriaeth fyw mewn eiddo trwyddedig a gweithleoedd ar gyfer cynulleidfa rhwng 200 a 500.

- Cerddoriaeth wedi ei recordio i gael ei drin yn yr un modd a cherddoriaeth fyw mewn eiddo trwyddedig rhwng 8.00 a 23.00.
- Perfformiadau o ffilmiau, dramau, chwaraeon dan do, cerddoriaeth fyw ac wedi ei recordio ar eiddo yn perthyn i Lywodraeth Leol, ysbytai, meithrinfeydd ac ysgolion (ac eithrio sefydliadau addysg uwch) heb gyfyngiad ar nifer y gynulleidfa rhwng 8.00 a 23.00.
- Eithrio'r sefydliadau uchod rhag gofynion trwyddedu mewn perthynas â cherddoriaeth fyw ac wedi recordio ar gyfer cynulleidfaedd hyd at 500 o bobl.
- Eithrio eiddo cymunedol fel neuaddau pentref ac eglwys a chanolfannau cymunedol rhag ofynion trwyddedu ar gyfer cerddoriaeth fyw ac wedi ei recordio ar gyfer cynulleidfa hyd at 500 o bobl.
- Eithrir syrcau ar gyfer perfformiadau o gerddoriaeth fyw ac wedi recordio, perfformiad dramau, dawnau a chwaraeon dan do rhwng 8.00 a 23.00, heb unrhyw gyfyngiad ar faint y gynulleidfa.

PENDERFYNWYD derbyn yr adroddiad.

Dechreuodd y cyfarfod am 10:00a.m. a daeth i ben am 10.40am